

Mañan tin Open House:

"Palma Real Residences": E Condominio cu ta cana man teni cu progreso di Noord!

ORANJESTAD (AAN) -- Despues di varios luna di trabao riguroso, detaya, y bon dirigi, mañan diasabra 20, y diadomingo 21 di maart, comunidad di Aruba por sera conoci cu "Palma Real Residences", durante su gran "open house". Situa na Palm Beach, net patras di First National Bank, "Palma Real Residences" a lanta man teni na e progreso di Noord. Pa duna mas informacion tocante e concepto nobo di vivienda aki DIARIO a entrevista Ing. Victor Acosta, General Manager di e Compania "Good Year Realty", cual ta e compania encarga cu e desaroyo y ehecucion di e proyecto aki.

UN CONCEPTO COMUNITARIO

"Palma Real Residences" ta un tipo di conodominio cu ta encera un concepto nobo di integracion comunitario. E ta consisti di 60 cas individual riba tereno propiedad. Cu un arquitectura mediterraneo di acabadonan di luho, y traha di material di excelente calidad, e ta ofrece e siguiente 4 diferente disenonan: VILLA IBIZA, cu ta consisti di 2 habitacion, 2 baño, sala, comedor, cushina y terraza; VILLA MENORCA: cu ta consisti di 2 of 3 camber, 2 baño, sala, comedor (convertible), cushina y terraza; VILLA MALLORCA, cu ta consisti di 3 habitacion (un "master room"), 2 baño, sala, comedor (cu su "half bath"), cushina y terraza, y VILLA

BALEARES, cu ta consisti di 2 piso. Abao e tin dos camber, un baño, un "storage room", comedor y cushina integra, un sala grandi, y terraza. Na e di dos piso tin dos habitacion: un camber principal y un camber familiar, baño priva, y balcon. Tur e cambenan ta bin cu su bon closet y ta hala atencion den tur e casnan e precioso ceramica riba vloer. Tur e casnan ta bin cu landscaping bunita y un sistema di irigacion automatico. Ademá lo tin un hardinero cu ta bay ta encarga di mantene tur e areanan berde. E comprador lo tin e opcion pa cumprá e cas cu mueble of sin mueble, igualmente cu aircó of sin aircó.

ASOCIACION DI DOÑO

Na diferencia di otro proyectonan cu e compania encarga a desaroya caba na Aruba e proyecto aki ta comunitario. "Esaki ta nifica cu tin un asociacion di doñonan cu tin e tarea di administra e areanan comun di e proyecto. Esaki ta por ehemplo e swimming pool, e play ground, un facilidad pa fiesta cu ta bin acerca, y e aspecto di security. E ta un area completamente priva cu ta bin cera cu un cura hopi halto, cu su security house permanente, unda semper lo tin un security guard encarga di mantene e seguridad di e conhunto", Ing. Victor Acosta a splica. E proyecto aki ta situa na un

area comercial/residencial, cu acceso na supermercado, school, misa, banco, restaurant y area di hotel. E ta un proyecto cu ta cana pareu cu e progreso di Noord. "E proyecto aki ta dirigi na tur hende cu kier biba den un calidad halto di vivienda, cu ta loke un concepto moderno di vivienda comunitario ta ofrece. E intencion ta pa bende e casnan cu hende local pero tambe cu esnan cu ta biba na otro lugar, pero cu kier cumprá un propiedad na Aruba. Na e momento aki e compania a traha e prome fase, cu ta inclui e infraestructura completo di e proyecto manera caminda, coriente, awa y e prome 8 casnan modelo", Ing. Acosta ta acentua.

OPEN HOUSE

Ing. Victor Acosta kier a invita henter pueblo di Aruba pa mira e proyecto aki e siguiente fin di siman. "Nos open house ta cuminsa diasabra di 9.30 di mainta te cu 4'or dia tardi, y ta sigui diadomingo di 10'or di mainta te cu 3'or di atardi. Ta bay tin snacks, coi bebe, bolo, musica, es decir, un ambiente hopi agradable. Tambe representantenan di e diferente institucionnan bancario di Aruba ta bay ta presente y dispuesto pa duna informacion relaciona cu e posibilidadnan di hipoteca pa financia e casnan aki".

SERIEDAD Y SOLIDEZ

GOOD YEAR REALTY ta un compania serio, stabil y solido cu a desaroya un proyecto hopi exitoso caba, tambe na Noord cu ta e urbanizacion residencial yama "Casas Gran Sabana", situa na Sabana Liber. Por bisa cu e casnan aki ta casi completamente bendi, y cu e personanan cu a adkiri un di e viviendanan aki ta sumamente satisfecho. "Nos compania a gana hopi prestigio caba na Aruba, desde aña 1990 cu nos a bin establece riba e bunita Isla aki. Seriedad, excelencia di trabao, y compromiso ta garantiza nos producto, y nos ta spera cu e fin di siman aki e publico lo gusta e producto nobo cu nos ta ofreciendo na prijs di introduccion", Ing. Victor Acosta a bisa, pa conclui nos entrevista. Riba potret un di e casnan modelo.

